

खास परातना की अरज बाइबल अनुवाद का काम में

- » मरकुस अन थरप्या तका का काम की किताब को परकासण जट किदो जा सके।
- » मेवाड़ी भासा में एक ओरी अनुवादक मल सके।

मण्डळ्याँ पे आदारित भणई का काम में

- » वागड़ी इलाका का पाँच गामाँ में वी. बी. एस. की कसाएँ सरू वे सके अन हव रितिऊँ चाल सके।
- » वागड़ी भासा में अणभण्या मोठ्यार विस्वास्योँ का वाते भणबा की चिजाँ त्यार किदी जा सके।
- » मेवाड़ी भासा में मण्डळ्याँ आदारित भणई का काम का वाते एक जणो मल सके।

गीत रचना का काम में

- » मेवाड़ी भासा में हव-हमच्यार की वीडियो केसिट हव तरयाऊँ बाँटी जा सके अन अणीऊँ ई समुदाय का मनक हाँच ने जाण सके।
- » वागड़ी गीताँ की केसिट जट त्यार वे सके अन वटा का हाराई मनक ई केसिट ने इस्तेमाल करे अन यो समुदाय ओर भी नुवा गीत बणाबा का वाते राजी वे जावे।

केणी हिको-केणी हुणाबा का काम में

- » मेवाड़ी अन वागड़ी भासा में केण्याँ बणाबा का वाते अटाकाईस समू त्यार वे सके।

क्रिसमस तेवार मसी समुदाय में आणन्द को तेवार मान्यो जावे हे। ई तेवारऊँ ओ आद किदो जा सके हे के, परमेसर मनक रूप में ई धरती पे जनम लिदो। यो अणाचेत को ने ल्यो, पण जनमऊँ पेल्योँ अलग-अलग परमेसर का आडीऊँ बोलबा वाळा, ईसु मसी का जनम का बारा में आगेवाणी किदी ही। आज मनक आपणाँ पापाँ, मांदकी अन सेतान का दवाबऊँ घेरिया तका हे। पण बाइबल में लिक्यो हे, “देको थाँका वाते एक मुगती-दाते जनम लिदो हे अन ओईस मसी परबु हे।” माँकी याईस परातना हे के, मेवाड़ अन वागड़ इलाका का मनक ईसु मसी पे विस्वास करे अन आपणी मांदकी हव वे सके। हुगळी आत्माऊँ छुटकारो पा सके अन आपणा पापाँ की मापी लेन हरग राज में जा सके। ई परातना में थाँ भी भेळा वे जावो। परबु थाँ हाराई ने आसीस दे।

थाँ हाराई ने बड़ा दन अन नुवा साल की घणी घणी सुबकामना



परमेसर मेवाड़ ऊँ अतरो लाड़ करे हे के...



ईसु मसी में हाराई भई-बेना ने जय मसी की!

मेवाड़ अन वागड़ इलाका में परमेसर आपणा काम ने औरी भी बडारिया हे, ईका वाते परमेसर को धन्नेवाद वे। हातेई हाते माँ थाँको भी धन्नेवाद कराँ हा काँके थाँ लोगाँ माँका वाते घणी परातना किदी हे। ई दाण माँ मेवाड़ी भासा में बाइबल को अनुवाद को काम कररिया हाँ, अन वागड़ी अन मेवाड़ी भासा में केण्याँ, गीताँ अन मण्डळ्याँ पे आदारित भणई का कामऊँ बापू परमेसर की सेवा में हाँ। थाँकी मदत का वाते धन्नेवाद। परमेसर माने खूब काम में लेरिया हे अन अणा हाराई को कारण थाँकी परातना हे। अणी सेवा का काम में अबानू ज्यो व्यो वींका बारा में थाँने बताणो छारिया हाँ, ताके आपाँ मलन परमेसर की मेमा कर सकाँ हा अन थाँ माका वाते ओर भी बड़िया तरियाऊँ परातना कर सको।

बाइबल अनुवाद का काम



- » पुराणा नेम में उत्पत्ति अन भजनों की किताब को सरुवाती अनुवाद वेग्यो हे।
- » नुवा नेम में होळा किताबों को सरुवाती अनुवाद वेग्यो हे।
- » मरकुस अन थरप्या तका का कामों की किताब की अंन्त की जाँच वेगी हे। अबे परकासण वेबा का वाते त्यार हे।

मण्डळ्याँ पे आदारित भणई (सी.बी.एल.)



- » वागड़ी में सरुवात की अक्करमाळा त्यार किदी गी हे।
- » वागड़ी भासा ईलाका में वी. बी. एस. चलाबा का वाते भणाबा की चिजाँ त्यार किदी गी हे।
- » दो मसी सम्मेलनाँ में छोरा-छोरी ने बाइबल आदारित भणई दिदी गी हे।

विकास का वाते खास रुकावट का रूप में हमेस्यान भणई ने देकी जा सके हे। मजबूती का हाते अन गणती में मण्डळ्याँ का विकास का वाते या भणई घणी जरूरी हे के, अस्या गाटा विस्वासी वे ज्यो वसन की आग्या मानबा वाळा वे अन दूजाँ लोगाँ ने भी हिकाबा वाळा वेवे। जद्यॉ कस्याँ मसी समुदाय में अणभण्या विस्वासी वेवे, तो या वाँका विकास का वाते एक अस्थी रुकावट हे ज्या हमेस्यान बणी तकी रेवे हे।

अटा तई के नरई वर हूदी मसी ने मानबा वाळा व्या केडे भी, अणभण्या विस्वास्याँ का नके घणा कम मोका आवे हे जणीऊँ वीं आपणा विस्वास ने बड़ा सके। काँके वीं खुद का वाते ने तो बाइबल भण सके हे अन ने हमज सके हे। ज्यादातर वाँको विस्वास वीं वसनऊँ बड़े हे जीने वीं परच्यार में हूणे हे। वींमें भी जतरो वसन वीं हमजे हे वींमें भी फरक देक्यो जा सके हे काँके या ई बात का जस्यान वेवे हे के, परच्यार का वाते कस्थी भासा काम में लिदी गी हे।

अनुवाद का हातेई हाते भणई को काम चलान गामड़ा का अणभण्या लोगाँ ने भणान वाँका विकास का वाते एक खास काम कररिया हे। माँकी या मरजी हे के, जद्यॉ मा समुदाय में सेवा करा तो वणी समुदाय में गाटा विस्वासी देकाँ। ई वाते माँ प्रोड भणई पे ग्यान देबा की कोसीस कराँ हा। अणी टेम पे हेली जाणकारी देबा का वाते ई घटना ने देकी जा सके हे। जीने राजस्थान में माँका एक हण्डाळ्याँ ने अस्यान बतई हे।

माँका अनुवाद समुऊँ एक जणो एक गाम में एक विस्वासीऊँ मलबा ग्यो जों वींके लाग-भाग वाळो भी हो। वटे भीतड़ा पे एक मसी केलेडर टाकी मेल्यो हो। जीमें नरई छोरा-छोरी का बचमें ईसु को फोटु मळ्यो तको हो अन वींका रेते एक वसन लिख्यो तको

हो मत्ती 19:14 ऊँ अस्यान लिख्यो तको हो, “बाळका ने मारा नके आबा दो अन अणाने रोको मती।” वो मनक ज्यो अणभण्यो विस्वासी हो, राजी वेन बोल्यो, “देको, कतरा बड़ीया तरियाऊँ ईसु आपणाँ छोरा-छोरीऊँ बातों कररिया हे। अन यो सई हे नी, ईसु के हात छोरा-छोरी हा। जद्यॉ अनुवादक अणी बात ने आपणा एक ओरी अनुवाद ने क्यो तो वणी घणा दाँत काड़या। वीं अनुवादक ई घटनाऊँ खुद का वाते मण्डळ्याँ आदारित भणईऊँ सेवा का वाते आपणी पाकी बलावट ने ओळकी के, वो आपणा समू का हाते वीं भासा में काम करबा का वाते भणई की ओजणा ने लेन वटे जावे।

ई टेम में वणी आपणा समू का वाते वटा की भासा में मण्डळ्याँ आदारित भणई का काम की ओजणा त्यार किदी हे। जणीऊँ नुवा अन पुराणा अणभण्या विस्वासी खुद का वाते बाइबल भण सके अन वीं ई तरियाँऊँ परमेसर का ग्यान अन वाँका वसनाँ में गाटा वेता रेवे।

गीत रचना को काम



- » मेवाड़ी-वागड़ी गीत की किताब ने ओरी नुवा गीताँ हाते पाच्छी परकासण किदी गी हे।
- » मेवाड़ी में दस गीत त्यार किदा ग्या हे।

एक दाण गीत रचना करबा वाळो समू वागड़ी इलाका का एक गाम में ग्यो। वटे कार्यक्रम व्या कडे वटा का पासवान ई तरियाँ आपणा मनऊँ बात कि, “यद्यॉ यो कार्यक्रम अटे नी वेतो तो माँ परबु ईसु का वाते खुद गीत नी त्यार कर पाता अन माँ जीते जी मर जाता।” गीत बणाबा का अणी कार्यक्रम माकी मदत किदी हे जणीऊँ माँ गीत त्यार कर सका अन परमेसर की मेमा कर सका।

केणी हिको - केणी हुणावो को काम



- » नुवा नेमऊँ वागड़ी भासा में तेरा केण्यॉ बणई गी हे।
- » पुराणा अन नुवा नेमऊँ मेवाड़ी भासामें बारा केण्यॉ बणई गी हे।

दूजाँ काम

- » मेवाड़ी अन वागड़ी भासा में कलेण्डर अन पोस्टर त्यार किदा ग्या हे।
- » मेवाड़ी में बड़ा दन को एक विडीयो बणायो ग्यो हे।

